

2018 Schnitzelpunk

Miar sind jetzt im Fall au intellektuell,
nümme so Puuratölpla, so scheiss provinziell.
Au wenn dia Causa Kuanz üs nid am Arsch hät gschtört,
händ miar, wia alli Gschida, üs aifach au empört.

Schtell diar vor, bisch Stadttrot und glich kennt di kai Sau.
Ghörsch nu immer Tom und Marti, das mögti üs doch au.
Wettsch äntlich mo inds Rampaliacht, muasch irgendöpis tua.
Notfalls gisch am Schualdirekter aifach mol dr Schua.

Dr Kuanz wird gjagd vom Jäger, liit am Boda, kann nur zucka.
Am Schualdirekter schüsst aswas a Stadttrot in da Rugga.
Jeda höher Tschooli törf jaga, schüssa, hüta,
nur am Cavigelli wends d Sonderjagd verbütta

Gmäss Jagdbetriebsvorschrifta, das isch jo nid zum säga,
müand d Jäger jetzt zum Jaga as lüchtigs Gilet träge.
Will aina vorletscht Johr an andara hät troffa,
sind jetzt dia wo Gilet tragend ab sofort nümme offa

Dr Jean-Gilles und dr Karlheinz sind scho lang as Paar,
händ zämme gära Spass, das isch doch völlig klar.
Doch jetzt isch fertig luschtig und Pausa in da Lända.
Si wettend nämlich nögscht Johr äntlich Bluat go spända

Sex and Drugs and CVP – dia Nögg könd sich nid zämme näh.
Sex and Drugs and CVP – könd sich nid zämme näh.
Gsehnds as wiiblichs Weesa, wo ihna täti gfalla,
blosends grad zum Agriff in dr Wandelhalla.
Sie könd jo nüt drfür, dia schiheiliga Affa.
Für öppis hät dr Herrgott tänk dia heissa Katza gschaffa.
Sex and Drugs and CVP – könd sich nid zämme näh.

Verlosch wäg dinem Hobby d Frau mit Huus und Kind,
git diar hüt dr Schaidigsrichter zümpftig ais an Grind.
Dr Bruader Klaus hät gwusst wias goht und gsait, seg Gottes Willa
Är seg jetzt heilig und müass drum a biz in Wald go chilla.

Dr Trump, dä sait zum Macron: He los mol, dini Schnalla
würdi miar für z Alter au no zimmi gfalla.
Druf maint d Firstlady zur Brischitt: Uf dä muasch gar nid losa,
hät nur a grossi Schnorra und glich nüt in da Hosa.

Miar gänd am Kim Jong Un a Wassersprützpischtola
und gönd am Donald Trump as Kartonschwärt go hola.
Dänn schickamers in Garta, döt gits a biz Radau.
Dia söllend das doch regla wia andri Goofa au.

Für jeda Rastamann isch's as Traumland gsi.
Palmastrand und Reggaesound, döt wär ma gärä hi.
Doch d Schwoba hänz versaut, kai Mensch ka das me laika.
Miar mögend nüt me ghöra vo däm scheiss Jamaika.

Dr Schneider-Ammann hät an Trick zum sini Data schütza:
Z Laptop niana ligga lo, im Notfall au druf sitza.
Als digitala Immigrant schafft är jetzt au mit Twitter.
Zwei Buachstaba hät är scho, nögscht Wucha goht's dänn witer

Kürzlich wo dr Bartli in Stall isch ina ko
und d Zitza vo dr beschta Kua in sini Händ hät gno,
do hät's na plötzlich tunggt, dia Kua macht gar nid Muuh.
Uf zmol hät är verstanda, au dia sait jetzt "Me too".

Kürzlich ufem Julierpass vor traumhafter Kulissa
händ miar üs gfrogt, hät's Origen jetzt ganz inds Hirni gschissa?
Statt Kunst im Turm as Höhafüür, das hätti doch me Schuss.
Drum gänd am Landi-Stift as Ticket zu sim Lehrabschluss.